

Cien aña di refinaria na Aruba

Eagle-Arend Petroleum Maatschapij ta cuminsa opera na Druif

Mientras construccion di Lago tabata tumando lugar na San Nicolas un otro refinaria tabata siendo construi na Aruba, na e parti west cerca di Oranjestad. Esaki tabatata Arend Petroleum Maatschappij (Eagle Petroleum Company), un subsidiario di Shell for di Compania Mexicana de Petroleo el Aguila.

E construccion di e refinaria Eagle a cuminsa cu un waf chikito na Taratata, cerca di e punto west na unda e compleho di waf na Oranjestad ta localisa. E waf di palo aki a wordo uza pa baha material di construccion cu despues tabata wordo transporta via un sistema di spoor Muir pa e sitio di construccion. Na comienso di 1928, tankeronan a cuminsa descarga azeta crudo na Taratata. Tres tankero tabata den servicio y construccion tabata continua. Trahadornan tabata traha 24 ora pa dia pa caba construccion di e refinaria den e tempo planea.

Tur cos tabata cla na juni 1928 y riba dia 14 di e mesun luna e tankero Britanico 'San Gerado' a carga 15.600 kg. di fuel oil pa Buenos Aires, y 20.000 kg. di fuel pa su mashinnan. E prome exportacion di petroleo refina na Aruba tabata un realidad.

Aunke Lago a cuminsa construccion prome cu Eagle Arend ta e di dos aki lo carga e titulo di a produci y exporta e prome producto refina for di Aruba riba 14 di juni 1928.

Pronto a realisa cu e waf di Taratata tabata inadecua pa sirbi e necesidadnan creciente di e compania y mapanan a wordo traha pa un waf nobo localisa na e parti mas west di e isla na Druif, net dilanti Manchebo Hotel. Den un tempo record pilarnan di staal y palo a yega.

E pier nobo cu lo bira un 'landmark', tabata 42 meter largo extendiendo te lama hundo. For di e pier aki dos extension (dede) a wordo construi. Na e parti di lama un petroleum dock di 250 meter largo cu 6 platform di 11 meter unda cu tankeronan por a mara tur dos banda.

Na comienso di Guerra Mundial II e refinaria tabata den su piek di produccion cu mas o menos 400 empleado sacando un variedad di productonan petrolero manera gasolin, kerosin, y diferente lubricante. Mescos cu Lago e tabata mikpunt di e torpedonan di Hartenstein.

Despues di a atake riba San Nicolas, Hartenstein a dirigi su submarino pa e refinaria p'abao y a lanza tres torpedo riba e tankero bashi 'Arkansas' un a dal e tankero sin causa mucho daño, e di dos a bay perdi na lama y e di tres a caba riba beach net unda awe Divi Divi Hotel ta localisa. Den trabaonan di desarma e torpedo aki 4 especialista a perde nan bida.

Durante Guerra Mundial II Eagle-Arend a cera su portanan for di 1942 pa 1945 mirando cu e no tabata produci fuel pa avion, e producto mas pidi na e momentonan ey. Azeta crudo tabata bay pa Lago of Shell na Corsow y e refinaria chikito aki tabata sirbi como almacenamiento.

Despues di guerra nunca mas e compania a logra yega na su capacidad maximo. Un periodo di incertidumbre a cuminsa. Tecnologia di refinacion di añanan 20 a cuminsa bira obsoleto y sistema di automatizacion a haci su entrada. Pa comiensonan di añanan 50 e gerencia mester a tuma decision si ta

modernisa e refinaria pa keda competitivo of cera su portanan. E ultimo tabata e decision final y na 1953 a cuminsa cu cera partinan di e refinaria.

Pa 1958 tur produccion a para cu unico actividad na e “tankfarm” cu tabata wordo uza pa e compania madre na Shell Curaçao.

Fuente di Informacion

Archivo di Biblioteca Nacional seccion Arubiana/Caribiana